



Komunikadu Imprensa
16 Dezembru 2021
Parlamentu Nasionál

JSMP konsidera desizaun Prezidente PN hodi la admite proposta deputada Maria Gorumali Barreto la tuir Konstituisaun RDTL no Rejimentu PN

Parlamentu Nasionál (PN) iha loron 06 Dezembru 2021 hahú hala’o diskusaun no votasaun iha espezialidade ba Proposta Lei Nú.34/V (4^a) kona-ba Orsamentu Jerál Estadu ba tinan 2022 ho nia montante total billaun \$1,675,000.000.00.

Prezidente PN distintu deputadu Aniceto Guterres Lopez iha nia intervensaun iha inísiu plenária ba diskusaun espezialidade ba OJE 2022 ne’e deside hodi la admite proposta mai husi proponente deputada Maria Gorumali Barreto hamutuk 10 ho razaun deputada nia intevesaun temi “*Governu defaktu no inkonstitusionál*”. Tuir Prezidente PN intervensaun ne’e hatudu ona katak deputada la konsidera Governu VIII legál, tanba ne’e nia laiha baze legál atu admite proposta alterasaun ba Governu ne’ebé nia konsidera ilegal no nia mós husu atu deputada ne’e halo rekursu ba tribunál se la konkorda ho desizaun Meza PN nian.

“JSMP konsidera aktu Prezidente PN hodi la admite proposta deputada Maria Gorumali Barreto tanba temi Governu defaktu no inkonstitusionál iha plenária ne’e la tuir provizaun Artigu 94 pontu 1) Konstituisaun RDTL no provizaun Artigu 8 pontu 1) Rejimentu PN kona-ba deputadu sira labele hetan responsabilidade sivil, kriminal ka dixiplinár tanba votu no opiniaun ne’ebé sira fó kuandu kaer sira-nia funsaun. JSMP mós konsidera aktu ne’e hanesan terror no persegisaun política ne’ebé fó perigu ba ezisténsia demokrásia iha Timor-Leste, liuliu iha órgaun soberania hanesan PN ne’ebé reprezenta sidadaun Timor tomak ne’ebé kaer poder lejislativu, polítiku no fiskalizaun”, dehan Diretora Ezekutiva JSMP, Ana Paula Marçal.

Nune’e, JSMP rekomenda ba Prezidente Parlamentu Nasionál atu bele uza nia kompeténsia tuir Rejimentu Parlamentu hodi labele viola direitu deputadu nian durante diskusaun sira iha PN inklui diskusaun OJE 2022.

Tuir observaun JSMP nian iha tinan ida ne’e, proposta adisionál hamutuk 161 no proposta adisional 143 mak admitidu iha diskusaun no votasaun espezialidade, entretantu proposta total 18 la admitidu tanba tempu no kestaun legalidade.

Proposta impedidu husi tanba kestaun legalidade husi deputada Maria Gorumali Barreto nian hamutuk 10 hodi husu aumentu ba ministériu no entidade Estadu sira mak hanesan orsamentu aumentu ba iha SEII iha verba transferensia pública, serbisu apoiu sociedade sivil no auditoria sosial iha bens no serbisu, Administrasaun Estatál husu aumentu ba iha verba bens no serbisu ba programa desentralizasaun administrativu, serbisu nasional ambulansia no emerjénsia médika husu aumentu iha katégria saláriu

no vensimentu ba unidade kuidadu saúde primária, Ministériu Saude husu aumentu verba bens serbisu, MSSl husu atu elimina orsamentu subsidiu alimentasaun ba pasiente HIV-SIDA no *bolsa de mae* jerasaun foun iha verba tranferensia pública, ministériu interiór iha verba bens no serbisu husu atu hamenus husi programa igualdade jeneru no inkluzau no aloka fali ba programa siguransa nasional.

Atu hetan infomasaun kompletu bele kontaktu:

Ana Paula Marçal

Diretora Ezekutiva JSMP

Email: ana@jsmp.tl

website: <https://jsmp.tl/>

Rua Beco Lakateu, Aldeia Manufuik,
SukuColmera, Administrativu Vera Cruz

Dili Timor Leste

PoBox: 275

Telefone: 3323883 | 77040735

www.jsmp.tl

ana@jsmp.tl

Facebook: www.facebook.com/timorleste.jsmp

Twitter: @JSMPtl